

„Wäntele“ Info !



Ussgoob 01 / 2012

Adie zämme

E weeneli spoot aaber doch no, kunnt die erscht Ussgoob vo dr „**Wäntele**“ – **Info!** Dr Verfasser mecht sich doo in aller Form vräxgysiere!

Uss em Zumpftroot

Dr neij Zumpftroot

Dr Zumpftroot het sich an synnere erschte Sitzig no de Waale sälber organisiert. Die einzelne Böschte sinn wie doo unde gschriibe, verdailt worde:

Fred M. Wagner	Maischter (esoo au gwäält)
André Stohler	Statthalter + Dambuurmaioor (esoo au gwäält)
Doris Rohner	Seggelmaischttere (esoo au gwäält)
Esther Trachsel	Schryybere
Doris „Walsi“ Walser	Goschdym- und Materialverwaltig
Stephie Wagner	Raiserorganisatioone + Webmaster
Marcel Wegmann	Marketing, Wärbig, Ussebeziehige, Kandidaatebetreug

Kasse

An dr letschte Sitzig vom Zumpftroot isch au iiber d Finance vo de Basler Källerwäntele Zumpft gredet und dischpediert worde. Me darf saage, ass d Laag nit esoo isch wie in Griecheland ooder in Schpanie; d Finanzwält vo unserer Seggelmaischttere isch guet, nit aaber graad z friidestellend! Nit well mr in de roote Zaale wääre, nai will s halt au bi de Wäntele esoo Glatti git, wo mit groosser Vrzeegerig und erscht no mindligge Maanige Verainsbyydrääg, Keschte an Raise ooder Beziig vo Material wie T-Shirts, Windjagge etc. etc. zaale dien.

D Seggelmaischttere wäär aifach froo, wenn sii nit allewyl em Gäld nooseggle und „bittibätti“ mache miest! Danggscheen vyylmool fir s Vrständnis!

Aktuell

E neiji Internetsyte

www.waentle.ch daas isch d Adrässe vo dr neije Internetsyte vo dr Basler Källerwäntele Zumpft. Gang emool yyne und lueg die neiji Syten aa. S isch e guete Wurf und mr saage dr Stephie Wagner, wo zämme miteme Kolleeg die Syte gschtaltet het, vyyle Dangg fir die Sisiphusarbet!

Uff dr neije Homepage git s au en intärni Syte, wo nuur fir d Wäntele Mitglicher bestimmt isch. Do kaasch in Zuekumpft au d „**Wäntele**“ – **Info!** lääse und aabelaade ooder anderi Informatioone lääse, wo wichtig sinn, so au zem Byspiil s Joorebrogramm ooder wenn de wo und wenn muesch syy. Zem in die Syte kennen yyzstyge, gisch als Passwort aifach s Grindigsjoor vo de Wäntele yy, und scho kaasch wie dr Bobele Becker saage „ich bin drin!“

Mr wintsche vyyl Vergniege bim ummesöörfe (aaber nai au, waas fir e komisch Baseldytschtwort!!)

Ussicht

D Wäntele Baiz am Juugedfescht uff dr Claramatte

Bald isch es sowyt; d Wäntele hänn am Jubiläum vom Juugedfeschtverain Glaibasel uff dr Claramatte e Baiz.

libers **Wuchenänd vom 09. / 10. Juni 2012** fyirt dr Juugedfeschtverain Glaibasel si 150 Joor Jubiläum und s Ushängeschild, s Glai Vogel Gryff Spiil, isch scho 100 Joor in de Glaibasler Gassen unterwäggs.

Daas isch e Grund, worum uff dr Claramatte im Glaibasel e zwaidäägig Fescht stiggt und d Wäntele sich yyverstande erklärt hänn, im Feschtzält nääbe de Setzlig vo dr AGB und dr Guggemuusig Grunz Gaischter e Baiz z fiere; nit aaber esoo wie doomols am Erlefescht, zämme mit em TV Horburg! Trotdäm as im Feschtzält no zwai anderi Baizer sin, wird in aigene Sagg yynegwirtschaftet und me hofft, ass non e guete Batze in d Kasse kunnt, respeggdiv ass ändlig emool e weeneli Gäld fir neiji Goschdym yynekunnt.

D Jessica Trachsel, d Kerstin Kreuzer und d Stephie Wagner hänn daas alles gmänätscht und e gueti Sach uff d Bai gschtellt. Kulinarisch wärde d Gescht mit emene Salaatdäller ooder mit Flaischkääs und Härdepfelsalaat ooder nur mit emene Bolle Flaischkääs und emene Weggli vrweent.

Drzue het s OK vom Juugedfeschtverain e ganz dolls Brogramm uff d Bai gschtellt! So kunnt under anderem uff d Biini vo dr Claramatte d *Melody Makers*, *Swiss Mariners Chanteymen*, d *Let's Gospel*, d *Drummelschuel vo de Top Secret*, d *Knabemuusig* und d *Mittwuchs Band*.

E kunterbunds Brogramm wo me nit sott vpasse! Doorum am Wuchenänd vom 09. / 10. Juni 2012 ab uff d Claramatte, bi dr Källerwäntele aanesitze, sich vrweene losse und gueti Muusig loose und mitenand schwätze, s luschtig und gmietlig haa!

E glaine Weermuetsdropfe git s halt au doo. Laider hänn sich weenig Wäntele aagmäldet zem hälfe, ass me „fremdi“ Greft het miesse engaschiere! Schaad aigendlig, denn s Gäld wo mr hoffendlig dien vrdiene, kunnt jo allne Wäntele z guet!

Tattoo Parade 2012

Drotz de Gweereele rund um s Basel Tattoo von e baar komische Veegel vo dämm skurrile Verain „Heb Sorg zem Glaibasel“, kaa jetze s Basel Tatto doch no stattfinde und doodrmit am **Samschtig, 21. Juli 2012** au wiider d Parade duur d Stadt duuregfirt wäärde.

D Källerwäntele mien s letscht Joor esoon e gueti Falle gmacht haa, ass mr fir daas Joor wiider vo dr Basel Tattoo Productions yyglaade worde sinn!

S isch en Eer fir uns, e Dail vo dääre Gwaltspatade z syy und doorum dien mr is wie s letscht Joor druff vorbiraite, ass mr suuber und mit Stolz uns kenne präsentiere.

Jeewyyle am **Mittwuche 11. und 18. Juli 2012 ab de siibeni bis am nyini z Oobe** git s wiider im **Birsfälde Haafe** Marschiebige!

Fir d Bewilligung isch en Aadraag gmacht worden und mr warte jetze nur no uff Bschaide vo dr Gmaind Blätzbums.

Die Wäntele, wo sich fir d Parade aagmäldet hänn, sotte scho mindeschtens an ainere Marschiebig drbyy syy. S wäär geegeniiber dääne, wo fir die Sach in d Hoose styyge und sogar zwai Mool kemme go Marschiebige mache nit fair, nit z koo!

Wäär aaber e guete Grund het (zem Byspiil Ferie) und nit an d Marschiebige kaa koo, sott sich rächtzytig bim Dambuurmaioor abmälde!

Daag vo de Stadtdoor

Noo de groosse Summerferie, am **Samschtig, 18. Augschte 2012**, isch wiider emool dr Daag vo de Basler Stadtdoor, wo jo scho syt Joore d Wäntele daatgreftig au mitmache dien.

Mr wäärde wie s letscht Joor wiider vom St. Albandoor Richtig Minschterhiigel laufe und irgendnaime dr erscht Apéro yynää, ass mr gschteerggt iiber dr Brugg ins Glaibasel kenne laufe. Mr wärde sicher wiider im Waisehuus bim Club zer alte Klappe kenne go s Midaagässe yynää.

Dr Zumpftroot isch doo langsam wiider am organisiere und wird rächtzytig iiber s Brogramm vo dämm Daag informiere.

Ribeauvillé

Mr hänn is wiider wien ejeedes Joor fir Ribeauvillé vom **Sunntig, 2. Sebädämber 2012**, aagmäldet. Jetzen isch aaber fir daas Joor en Absaag koo, well s OK vo Ribeauvillé en Abwäggsilig in Umzug yyne bikoo will! S gseet fascht drnoo uss, ass mr zuekimpftig im Rhythmus vo zwai Joor Ribeauvillé mien ooder derfe plaane!

Jänu, jetze wärde mr halt daas Joor vom Määl vrschoont blyybe!! Schaad! (nit wäägenem Määl, wäägenem guete Wyy und dr Gselligkait!)

Ruggblig

Drummlebummle in Ziiri

Am **Frytig, 13. Abrille 2012** sinn e baar vo de Wäntele wiider uff Ziiri an s Drummlebummle gfaare, won ejeedes Joor am Frytig vor em Säggsilyte vo de Zircher organisert wird. S isch fascht scho zer Dradizioon worde, ass d Wäntele derte mitmache. Schaad, ass e baar Wäntele bim groosse Basler Huffe dien yystoo und d Glägehait nit phagge dien, dr erscht Ussfluug vom Joor mit de Wäntele z mache. S wäär e gueti lebig, sich an d Wäntele und iir Repertoire z gweene. S isch nur esoon e Bemergigg vom Vrfasser!!

No de groosse Differänze mit em Stiefvater sinn mr s erscht Mool mitemenen anderen Unternäame no Ziiri gfaare. E Schwyzerbus, wo halt e weeneli diirer isch, als dr Schwoobe Stiefvater, aaber drfiir mee Komfort het und dr Faarer d Schwyz kennt und nit uff Umwääge no Ziiri ooder schunsch wo aane faart. Daas het nadyrlig d Usswirgig, ass dr Bryys pro Persoon e weeneli dyyrer isch und wird syy, ass in den andere Joore.

Aaber mr maine:

Lieber e suubere und sichere Bus und e Faarer wo weiss, won äär annefaare muess, ass e billige Jakob mitemene Bus wo d Schyssirolle fääle und dr Dieselmotor fascht abschtellt, well nit rächt noocheffillt worden isch ooder fascht en Unterfierig rammt, well dr Faarer si Navigräätt uff „Personenauti“ yygschtellt het!!

Spaarsenässe

S Spaarsenässe vom **Frytig 11. Maie 2012** im Waldhorn, diräggd no dr Gränze Rieche Hörnli, isch seer guet gsi und au vo 25 Wäntele und Partner gnosse worde. Mr hännss gmietlig kaa und s het reegi Gschprääch gää. Laider het s drnoo wääge dr Rächdig non e baar Unstimmigkaite gää – däa Servierdöff het aifach nit kenne rächt rächne und abstryche – aaber daas isch uss dr Wält gschafft und greeglet worde!

S nääggscht Joor, wenn d Wäntele wänn, ass mr wiider e Spaarsenässen organisiere, geen mr aifach nimme in däa Laaden yne. Ganz aifach!

Soodeli, daas wäärs fir s Erschte gsi. Die nääggscht „**Wäntele**“ – **Info!** kunnt ebben esoo aafangs Juli, kurz vor dr Basel Tattoo Parade!

Achtung

Daas isch jetze die letscht „**Wäntele**“ – **Info!**, wo no per Email vrschiggt wird. Die nääggschte kaa me drnoo im Internet under www.waentele.ch im intärne Beryych lääse und au ussdrugge, wenn me will.

Adie zämme, händs Guet und bis zem nääggschte Mool!

dr Zumpftroot vo de Basler Källerwäntele Zumpft